

## **Ebbaluṅa eyi Pawulo gaṅandiihira Abarooma Abarooma Enyanjula**

Pawulo nj'owaṅandiihira *Abarooma* ebbaluṅa yino ṅagati w'omwaha ogw'ataanu neene n'ogwataanu namunaana oluvanyuma lw'ohusaaliwa hwa Kurisito. Mu biseera ebyo, Pawulo gaali ahiiri huhyala e Rooma. Abafugiirira Kurisito abomu Rooma aba gaṅandiihira, mwalimo Abayudaaya n'Abatali Abayudaaya. Ebbaluṅa yino gayiṅandiihira mu hibuga Koriiso eyi gaali mu ehiseera ehyo. Gendire abaatu bosibosi bafugiirire Yesu Kurisito era bamugondere (16:26).

Ehitabo hino hy'omugaso eyiri abafugiirira Kurisito abali hiisi ṅaatu mu ehiseera hyosihyosi olwohuba Pawulo anyonyola hu bunonosi ati hubusuna olw'ohufugiirira Yesu Kurisito. Abahugu mu by'Ebbayibbuli baloma baati omusingi gw'ebbaluṅa yino gwendiiye hu 1:16, oluloma luuti, "Ese sihipambya soni ohubuulira Amanuliro Amalaṅi, olwohuba nj'engeri ya Hatonda ey'ohunonola Abayudaaya n'Abatali Bayudaaya abafugiirira Yesu."

### **Ebiri mu bbaluṅa yino mu buupi**

1. Pawulo geyanjula era aloma nohu bagaṅandiihira (1:1-15)
2. Obulamu w'abaatu n'engeri ey'ohunonoha (1:16-11:36)

3. Obulamu obu bafugiirira Kurisito bali n'ohubamo (12:1-15:13)
4. Obuheese (16:1-27)

### *Obuheese*

<sup>1</sup> Ndiise Pawulo omuñeeresa\* wa Yesu Kurisito oyu Hatonda galanga era ganjabula ohuba omuhwenda wuwe, ndomere abaatu Amanjulo Amalanji aganjwa eyi ali.

<sup>2</sup> Amanjulo gano Amalanji Hatonda gagasuu-bisa abaatu ohwema ahale nahale n'abita mu byanjandiihiwa ebyawufu ebi banaabbi babe banjandiiha.

<sup>3</sup> Era Amanjulo gano Amalanji ganjamba hu Mwana wuwe oyu basaala hy'omuutu ohunjwa mu lulyo lwa Habaha Dawudi.

<sup>4</sup> Hatonda omwene gahihahasa ati Mwana wuwe ni gamulamusa n'atambisa amaani g'Omwoyo Omutukuvu. Omwana wuwe oyo nje Musengwa weefe Yesu Kurisito.

<sup>5</sup> Hatonda n'abita mu Yesu oyo, gaapambira ehisasabirisi gaafuula muhwenda wuwe tiine ndomere Abatali Bayudaaya bosibosi obuhwenda buwe bahamudemuhira olw'ohumufugiirira.

<sup>6</sup> Era enywe mwesi muli mu abo aba Hatonda galanga ohuba abaatu ba Yesu Kurisito.

<sup>7</sup> Mbanjandiihira ebbaluja yino, abahoda eyiri Hatonda, enywe mwesimwesi aba galanga ohuba abaatu babe ni mumenyire mu hibuga e

---

\* **1:1 1:1** Oba omwidu.

Rooma. Mbasabira ti Hatonda Seefe ni Musengwa Yesu Kurisito babanjambire ehisasibirisi era babanje n’emiyaaya.

### *Ohweyaasa n’ohusaba*

<sup>8</sup> Neheerera n’ohweyaasa Hatonda wange ni mbita mu Yesu Kurisito olwenywe mwesimwesi, olwohuba hiisi n̄aatu mu hyalo hyosihyosi abaatu baloma hu hufugiirira hwenywe.

<sup>9</sup> Peeresa Hatonda n’omwoyo mulala ni ndomera abaatu Amanjuli Amalan̄i aganjamba hu Mwana wuwe. Hatonda oyo amanyire era abona ng’olu habuhyabuhyamba mahonyaho mu husaba hwange.

<sup>10</sup> Era hiisi hiseera saba ti Hatonda mu husiima huhwe geguleŋo engira niije mbaboneho.

<sup>11</sup> Negomba ohuuja eyo ohubagumya mwahanangala mu hufugiirira hwenywe.

<sup>12</sup> Ko huloma hugobosaniemo amaani mu hufugiirira hwefe.

<sup>13</sup> Aboluganda, nenda muhimanye muuti emirundi mingi nendire ohuuja eyo aye ohwola hatyane hihiri hunangiha. Nenda niije mbayeede ng’olu njedire Abatali Bayudaaya mu bifo ebindi mwesi mwahanangala mu hufugiirira hwenywe.

<sup>14</sup> Olwohuba ndi n’ebbanja eryohulomera Abatali Bayudaaya† ab’esibo n’esibo, abalabuhi n’abanubeebe Amanjuli Amalan̄i.

---

† 1:14 1:14,16 Ebbayibbuli ejindi jiroma jiiti Abayonaani n’abamawanga agandi.

15 Ehyo c'ehigima ni nenda ohubuulira Amanuliro Amalaŋi eyiri enywe mwesi abali e Rooma.

16 Ese sihipambya soni ohubuulira Amanuliro Amalaŋi, olwohuba nj'engeri ya Hatonda ey'ohunonola Abayudaaya n'Abatali Bayudaaya abafugiirira Yesu.

17 Hiri hiityo olwohuba mu Manuliro Amalaŋi Hatonda alaga engeri eyi asiimamo omuutu olw'ohumufugiirira n'omwoyo mulala. Ehyo hiri hiityo ng'olu hyaŋandiihiwa hiiti, "Oyo ahola ebiruŋamu alibaŋo mulamu olw'ohufugiirira huhwe."

*Ehiruŋi hya Hatonda eyiri abahola ebibi*

18 Ehiruŋi hya Hatonda hiri huhwehuha ni hiŋwa mwigulu hu baatu abatamumanyire era abahola ebibi ni beegalirisa ehituufu n'obubi waawe obubahola.

19 Ehyo hiri hiityo olwohuba hiisi muutu aŋanga ohumanya ehituufu ehinamba hu Hatonda ko weeyite olu omwene gaahena ohuta aŋalafu ebimuhyaho.

20 Ohuŋwera erala hu hutonda hw'ehyalo, Hatonda oyu omuutu ataŋanga hubona n'emoni ali n'obuŋangi emirembe n'emirembe era amaani gage gabonehera mu ebyo ebi gaahola. Era olw'ehyo abaatu abo banjuma hy'ohwenambya ohugaana ohumujumirya.

21 Wayire bamanyire baati Hatonda aliŋo, sibamujumirya ng'olu hisaanira oba ohumweyaasa olw'ebyo ebi abaŋa. Mu hifo hy'ebyo, baneeganga hu binambulamo

n'emyoyo jaawe eminubeebe nga ko jisirinjalira erala.

<sup>22</sup> Wayire beranga ohuba bagesi aye beyongera husirinjala busirinjale.

<sup>23</sup> Era boola n'ohunamba enono eri bahaŋaaye Hatonda atalifa emirembe n'emirembe, baaliŋa ebifaanani ebibabbota obubbote ebifaana hy'abaatu, n'esolo, n'enyuni ko n'ebyenjalula.

<sup>24</sup> Olw'ehyo, Hatonda yeesi gabaŋwaho gabaleha bahole obuhwedi ng'olu hwegomba hw'emyoyo jaawe hwali, ng'aŋo ko beehola eby'obunemu.

<sup>25</sup> Mu hifo hy'ohufugiirira amazima agaŋamba hu Hatonda, basalaŋo hufugiirira eby'obudulingi era nga bagobola hu hujumirya n'ohuŋeeresa ebitonde obutonde mu hifo hya Hatonda omwene hubitonda. Oyo nj'oyu baatu bali n'ohuŋa enono emirembe n'emirembe. Amiina.

<sup>26</sup> Olw'ebiitu hy'ebyo, Hatonda gabaŋwaho gabaleha bahole eby'obunemu ebi ohwegomba hwawe hubatuma. N'abahasi baawe boosi nga balehera ohwenjimba n'abasinde bagobola mu huba n'abahasi bahyawe.

<sup>27</sup> Mu ngeri nj'enyene, abasinde boosi baaleha engeri eyi Hatonda gataŋo ey'ohwenjimba n'abahasi bagobola hu basinde bahyawe. Abasinde bahola eby'obunemu n'abasinde bahyawe era nga basuna ehiguudyo olw'ebitoola byawe ebyo.

<sup>28</sup> Ni bahibona ti sihisaanira hutya Hatonda, nga yeesi abaŋwaho abaleha bahole ebinumamo

ebi batagwene huhola.

<sup>29</sup> Nga beyijuusaho obubi owa hiisi ngeri, omuli ohuhola ebibi, omulungo, n'obugwenyuh. Bejuuye egongi, omwoyo ogw'owiiti, ohujoberesania, obudulingi, n'ohulimirira abahyawe. Baatu abageesya olugambo,

<sup>30</sup> abanjayirisa abahyawe, abatenda Hatonda, abanyoomi, abehudumbasa era abepaahapaaha, abaatiina ni basegano amagira amanyaha ag'ohuhola ebibi era abatagondera basaaye baawe.

<sup>31</sup> Bahola eby'obunubeebe, banuma mazima wayire omwoyo ogulumirwa abahyawe, emyoyo jaawe jiri hy'ejesolo.

<sup>32</sup> Wayire bahimanyire baati ehiragiho hya Hatonda ehinjamamo hwehubbira hiroma hiiti abahola ebiitu hy'ebyo, Hatonda abasalira ogw'ohufa, sibahoma hu hubihola abeene hyonene aye basemba ni nabo ababihola.

## 2

### *Hatonda asala omusango n'atehubbira*

<sup>1</sup> Naahani ewe osalira owahyo omusango olw'ehibi ehi aholire obula hyahwenjambya, olwohuba esambo eyi omusaliramo weesi oba ogwesalira, nange ti ebi omusalira omusango weesi mbebi ohola.\*

<sup>2</sup> Naahani humanyire huuti Hatonda n'asalira abaatu hy'abo omusango guba guboola.

---

\* **2:1 2:1** Yis 52:5

3 Aye ewe omuutu obuutu onabasalira omu-sango ate nga ko weesi ebi bahola mbebi ohola, oñeega oti olinunuha Hatonda ohuguhusalira?

4 Añõ sooba n’otala ohwehaliriha n’ehyere hya Hatonda ehibitiirifu? Somanyire oti Hatonda ahunambira ehisasabirisi wahehubba mu hifuba wacuusa omwoyo gugwo?

5 Aye olw’obuhahadafu w’omwoyo gugwo n’otenda hwebbwaga, wehumbaanihisyaho ehiruñi hya Hatonda ehyohu ludaalo olw’ekomererero olu alisaliraho emisango n’atehubbira.

6 Hu ludaalo olwo “Hatonda aliña hiisi muutu omuhemba ogwolana n’ebigahola.”\*

7 Era abo abegumya ohuhola ebirani olw’ohwenda Hatonda abambase enono n’obulamu obutanwanõ, aja hubibanõ.

8 Aye abo abahola ebyawe hu waawe ni banyu-mirwa eby’obudulingi mu hifo hy’amazima, Hatonda aja hubagudya n’ehiruñi ehy’amaani.

9 Ebiitu biriba bibi eyiri hiisi muutu ahola ebibi, ni bitandihira hu Muyudaaya ko ogoboseho Atali Muyudaaya.

10 Aye Hatonda alyambasa hiisi muutu ahola ebirani enono era gaamuña n’emiyaaya n’atagihira hu Muyudaaya nga ko aloosaho Atali Muyudaaya.

11 Hatonda alihola atyo olwohuba paño muutu oyõ aboola.\*

12 Wayire Abatali Bayudaaya banuma magam-bi aga Hatonda gaña Musa aye balibasalira

\* 2:6 2:6 Zab 62:12 \* 2:11 2:11 Mag 10:17

omusango ni bateema hu magambi ago. Ne nibo Abayudaaya abahola ebibi, balibasalira omusango ni beema hu magambi olwohuba bagamanyire.

<sup>13</sup> Bino mbiroma olwohuba abaatu aba Hatonda abala ohuba abagwalaafu simbaabo abanjulira hunjulira ebi magambi galoma aye abahola ebi galagira.

<sup>14</sup> Abatali Bayudaaya banjuma magambi aga Hatonda gaja Musa. Aye banahola ebiri mu magambi mu hutegeera hwawe ohw'obusaale, ehyo hiba egambi eyi bali.

<sup>15</sup> Ebi bahola biraga biiti Hatonda ganjandiiha amagambi hu myoyo jaawe. Era hireetera emyoyo jaawe ohubaloma jiiti hino oholire hiranj oba hibi.

<sup>16</sup> Bino biryolerera hu ludaalo olu Hatonda alisalira abaatu emisango n'abita mu Yesu Kurisito, ej'ebyo ebi baholanga mu ngiso era bunu nj'obuhwenda obu ndomera abaatu.

### *Abayudaaya n'Amagambi*

<sup>17</sup> Mwepaahapaaha olwohuba mbo muli Bayudaaya, abamanyire amagambi era mweginiha olwohuba mbo muli baatu ba Hatonda olw'ekolagana ey'enjabulo erinjo ngati wenywe ni naye.

<sup>18</sup> Era mweginiha olwohuba mbo mumanyire ebi Hatonda genda abaatu bahole olwohuba mubisoma mu magambi.

<sup>19</sup> Era mwenjira ohuba ndinywe abanjambira abanjofu omuhoomero era muli enjase eyiri abo abahiiri mu hiirema.



<sup>20</sup> Mwenjira ohuba abasomesa b'abanjubebe era baabo abali hyabanjere abatamanyire ehi bahola. Ehyo muhiroma olwohuba mbo muli n'amagambi era mumanyire amazima.

<sup>21</sup> Ale njaa hani enywe aberanga abahanjanye, ni mundomere! Enywe abasomesa abandi, lwahiina simwesomesa mwabeene? Musomesa muuti abaatu bataba n'omuhono omuleeni aye enywe mugunuma?

<sup>22</sup> Muloma muuti abaatu bataba n'emoni enyangu, enywe muyinuma? Muduhirira abajumirya ebifaanani, ebitali Hatonda aye simunjuuna mu bifo ebi bajumirihisyamo ohunyagulula ebyamo?

<sup>23</sup> Enywe abepaaha mbo mugendera mu magambi ga Hatonda, simuhubba Hatonda esoni ni mugabbwaga?

<sup>24</sup> Olw'ebyo ebi muhola, c'ehigima hyanjandiihiwa hiiti, "Mugira Abatali Bayudaaya ni bafodogola Hatonda."

<sup>25</sup> Ohuhomola olw'ohulaga oti oli muutu wa Hatonda, huba hwamahulu singa onamba amagambi gage aye onagabbwaga soobaho njabulo n'atali muhomole.

<sup>26</sup> Singa Atali Muyudaaya gooheresa ebi magambi galoma, Hatonda saaja humunjira hy'Abayudaaya abahomola?

<sup>27</sup> Atali Muyudaaya owooheresa ebi magambi galagira alihusalira ewe Omuyudaaya endiho omusango n'oba n'otagendera mu magambi wayire nga wahomola.

<sup>28</sup> Omuutu saaba Muyudaaya endiho olw'ohwoheresa obulombolombo

bw'Ehiyudaaya oba olw'ohuhomola.

<sup>29</sup> Aye Omuyudaaya endiho nj'oyo ahola ebi Hatonda asiima era ohuhomola ohutu-ufu nj'ohwebbwaga wacuusa omwoyo sosi ohujamba bunjambe amagambi agabanandiiha. Omuutu hy'oyo wayire abaatu sibamusiima aye Hatonda niye amusiima.

### 3

#### *Owesigwa wa Hatonda*

<sup>1</sup> Ale njaaahani ohuba Omuyudaaya hiri n'omugaso hi, oba ohuhomola hugasa hi?

<sup>2</sup> Ohuba Omuyudaaya higasa mu ngeri nyingi, ehisooka Abayudaaya mbaba Hatonda ganjambya obuhwenda buwe.\*

<sup>3</sup> Aye singa Abayudaaya abandi sibafugiirira ebya Hatonda, ehyo hiba hiraga hiiti simwesigwa eyi bali?

<sup>4</sup> Kadi nanadiidiri! Hiisi muutu anjagire ohuba mudulingi aye Hatonda niye asigala n'ali w'amazima. Ng'olu hyanandiihiwa hiiti; "Ko bahahase baati ewe Hatonda oloma amazima.

Siwehubbira n'osala emisango."\*

<sup>5</sup> Aye singa ebibi byefe Abayudaaya bita anjalafu obulanji wa Hatonda, huba n'ehyohuloma? Hatonda saaba mutuufu ohutugudya? (Bino mbiroma mu buutu).

<sup>6</sup> Nenga sipohiri. Hatonda abanga ni gehub-bira gahanjagire atye ohusalira abaatu bosibosi omusango?

---

\* 3:2 3:2 Eby'omugaso ebindi biri mu suula 9:4-5.

\* 3:4 3:4

7 Omuutu asobola ohwebuusa ati, “Obanga obutali wesigwa wange bulaga ng’olu Hatonda ali mwesigwa era hireetera abaatu ohumujumirya, lwahiina gaasalira omusango?”

8 Ehyo hireeteera abandi ohumbeneera baati mbo somesa ti “Huhole ebibi ko ehyere hya Hatonda hyeyongere.” Ale Hatonda asalira abaatu abo abandomaho baaty omusango.†

*Enjuma muutu wayire mulala asaana*

9 Njaahani ehituufu c’ehiri ne? Efe Abayudaaya huhira Abatali Bayudaaya ohuba abalanyi? Bbe, mu moni ja Hatonda abaatu hwesihwesi huli njaasi w’obunangi w’ehibi.

10 Ng’olu hyanandiihiwa hiiti,  
Enjuma wayire mulala ahola ebirunamu, enjuma wayire mulala.\*

11 Enjuma ategeera ehiranyi ehyohuhola,  
wayire ayayanira ohwendula Hatonda.

12 Bosibosi baanaba banwa hu Hatonda,  
bosibosi njalala bahola ebibi.

Era enjuma wayire mulala ahola ebirunamu,  
enjuma wayire mulala.

13 Ebi baloma binunya ehibulu hy’ehigombe  
era ebi baloma byabudulingi.

Ebibono byawe biri hy’obusagwa w’etemu.

14 Eminwa jaawe  
jijofumula hujofumula ebinwabo,  
ebibono bihambwe byereere.\*

15 Sibemoota hu hy’ohwita abahyawe.\*

† **3:8 3:8** Ehi Pawulo agobolamo ohisanjana mu suula 6. \* **3:10**

**3:10** Zab 14:1-3; 53:1-3 \* **3:14 3:14** Zab 10:7 \* **3:15 3:15** Yis 59:7-8

16 Hiisi eyi baja

balehaŋo ohusihiiriha n'amaliro.

17 Ebiitu ebireeta emiyaaya, simbebibahola.

18 Ni Hatonda yeesi sibamuŋa eŋono.\*

19 Ŋaahani humanyire huuti byosibyosi ebi magambi galoma biŋamba hu Bayudaaya aba magambi ga Musa gaŋuga, ŋaŋume oŋunuha Hatonda n'asalira abaatu omusango.

20 Olw'ehyo eŋuma muutu wayire mulala oyu Hatonda abala ohuba omugwalaafu olw'ohuŋamba amagambi ago olwohuba eŋuma owoheresa gosigosi. Aye amagambi ago gayeeda omuutu ohumanya n'abbengire.\*

*Batubala ohuba abagwalaafu olw'ohufugiirira*

*Yesu*

21 Aye ŋaahani Hatonda ataaye aŋalafu engira eyi abaliramo abaatu ohuba abagwalaafu. Engira eyo amagambi aga gaŋambya Musa ko n'ebi abanaabbi baŋandiiha, biyiromaho.

22 Hatonda abala abaatu ohuba abagwalaafu olw'ohufugiirira Yesu Kurisito. Ŋaŋuma njawulo ŋagati w'Abayudaaya n'Abatali Bayudaaya,\*

23 olwohuba abaatu bosibosi babbengi mu moni ja Hatonda era ŋaŋuma kadi mulala owolana n'eŋono lirye.

24 Aye abaatu bejeerera omusango hu wereere aŋaŋuma hubugula ndiŋi olw'ehisasabirisi hya Hatonda olw'ohufa hwa Yesu Kurisito hu musal-abba ohwali endiŋi ey'ohubanunula.

---

\* **3:18 3:18** Zab 36:1      \* **3:20 3:20** Zab 143:2; Bag 2:16      \* **3:22 3:22** Bag 2:16

25 Hatonda ohulaga ti sigehubbira, ganayo Yesu bamuhomerere hu musalabba afuuhe endiŋi olw'ebibi by'abaatu ko hiisi amufugiirira, Hatonda amusonije. Ehyo gahihola olwohuba gehaliiriha ebibi ebi baatu baaholanga, ndabagudya.

26 Hino gahiholanga olw'ohwenda ohulaga abaatu mu hiseera hino ati sigehubbira. Era hiisi muutu afugiirira Yesu gejeerera omusango.

27 Naahani olwo huŋanga ohwepaaha huuti Hatonda atubala ohuba abagwalaafu olw'ebikolwa byefe ebiraŋi oba olw'ohuhuuma amagambi? Bbe sipohiri. Huba bagwalaafu lwa hufugiirira Yesu.

28 Huhinywanywasa huuti omuutu gejeerera omusango mu moni ja Hatonda olw'ohumufugiirira aye silwahuhuuma amagambi.

29 Kaho Hatonda w'Abayudaaya boŋene? Omwene oyo sinje Hatonda w'Abatali Bayudaaya boosi? Ehituufu hiri hiiti abaatu bosibosi babe.

30 Hatonda omulala wogobbo oyo nje ow'Abayudaaya abahomola ko n'Abatali Bayudaaya abatahomola era nj'abala bosibosi ohuba abagwalaafu olw'ohumufugiirira.

31 Ni hiba hiityo olwo hulome huuti amagambi ganuma mahulu olw'ohufugiirira? Kadi nanadiidiri! Wabula huganywanywasa bunyanywase.

## 4

*Yibbulayimu bamubala ohuba mugwalaafu olw'ohufugiirira*

<sup>1</sup> N̄aahani hunaalome hiina huhu sehulu yeefe Yibbulayimu gafaania hu binamba hu bugwalaafu?

<sup>2</sup> Hatonda aba ni gabala Yibbulayimu ohuba mugwalaafu olw'ebikolwa bibye ebiran̄i, gahabaaye n'ehyohwepaaha eyiri abaatu aye mu moni ja Hatonda gahan̄umire.

<sup>3</sup> Ehyañandihwa hiroma hiiti, "Hatonda gabala Yibbulayimu ohuba mugwalaafu olw'ohufugiirira ebi gamuloma."\*

<sup>4</sup> Omuutu n'ahola omulimo, bamuñ̄a omuhemba aye sibamuñ̄a hirabo.

<sup>5</sup> Hatonda abala omuutu omubi ohuba omugwalaafu lw'ohumufugiirira, sosi lw'ebikolwa bibye ebiran̄i.

<sup>6</sup> Era hino nj'ehi Habaha Dawudi galoma hu muutu oyu Hatonda asiima n'ateemire hu hiran̄i ehi aba n'aholire.

<sup>7</sup> Galoma ati,  
"Gesimire oyo oyu basoniñ̄a ebyonoono bibye, oyu bawiiha hu bibi bibye.

<sup>8</sup> Gesimire oyo oyu Musengwa atabalaho ebibi ebi aholire."\*

<sup>9</sup> N̄aahani ohwesiima ohwo hwa Bayudaaya bonene olwohuba bahomola oba n'Abatali Bayudaaya boosi wayire sibahomola? Hulomire huuti Hatonda gabala Yibbulayimu ohuba mugwalaafu olw'ohufugiirira ebi gamuloma.

<sup>10</sup> Kaho Hatonda ohubala Yibbulayimu ohuba mugwalaafu, hwaliño n'ahenire ohuhomola oba n'ahiiri? Hwaliño ko ahene ahomole.

---

\* 4:3 4:3 Tand 15:6      \* 4:8 4:8 Zab 32:1-2

11 Ehiseera hyabitanjo nga ko bahomola Yibbulayimu, ng'ohuhomola huhwe huba habonero ohuhahasa haati Hatonda gamubala ohuba omugwalaafu olw'ohufugiirira. Era ng'afuuha sehulu y'abaatu bosibosi aba babala ohuba abagwalaafu olw'ohufugiirira Hatonda wayire nga bahiiri huhomola.\*

12 Era Yibbulayimu oyo si sehulu w'Abayudaaya abahomole obuhomole hyonene aye ni bafugiirira hya niye olu gafugiirira Hatonda ni bahiiri huhomola.

*Ebi Hatonda gasuubisa babisuna lwa humufugiirira*

13 Hatonda sigasuubisa Yibbulayimu n'abomu lulyo lulwe ati baja hulya ehyalo olw'ohunjamba amagambi aga banja Musa aye bamubala ohuba mugwalaafu olw'ohufugiirira.\*

14 Ohunjamba amagambi hibanga nj'ehireteera Hatonda ohunja abaatu ebi gasuubisa, hani ohufugiirira hunjuma mahulu n'ehisuubiso ehyo hyahali hifu,

15 olwohuba egambi lireetera Hatonda ohugudya abaatu n'ehirunji ehy'amaani. Era ni nanjuma egambi, sinjaba hulibbwaga.

16 Olw'ehyo ehisuubiso hya Hatonda hyediye hu humufugiirira. Era olw'ehisasabirisi hihye eriyo obuhahafu ti baja hu hisuna. Sigasuu-bisa abomu lulyo lwa Yibbulayimu abahuuma amagambi bonene aye n'abafugiirira bosibosi

---

\* 4:11 4:11 Tand 17:10 \* 4:13 4:13 Tand 17:4-6; 22:17-18

ng'olu Yibbulayimu sehulu yeefe hwesihwesi gamufugiirira.

<sup>17</sup> Ng'olu hyanandiihiwa hiiti, "Kufuuye sehulu y'abaatu abamawanga eduuli." Yibbulayimu oyo, nje sehulu yeefe mu moni ja Hatonda alamusa abafu era alagira ehinumaŋo hyabaŋo.\*

<sup>18</sup> Yibbulayimu n'esuubi gafugiirira ebya Hatonda era gafuuha sehulu y'abaatu abamawanga eduuli ng'olu bamulomaho baati, "Oja huba n'olwebe lw'abaana ni batabaliha hy'emunyeenye."

<sup>19</sup> Niiye siganwamo amaani mu hufugiirira huhwe wayire gaali aŋesa emyaha huupi cikumi ej'obuhulu era ni Saala omuhasi wuwe gaali asahulunjire n'ataheja ŋamugulu. Bombi baali hy'abafu.\*

<sup>20</sup> Sigabuusabuusa aye geyongera ohufugiirira ebya Hatonda era n'amujumirya olw'ebyo ebi gaali n'aja humuŋa,

<sup>21</sup> gaali n'obuheneerefu ati Hatonda ali n'obuŋangi ohwoheresa ehi gamusuubisa.

<sup>22</sup> Hino nj'ehyagira bamubala ohuba mugwalaafu.

<sup>23</sup> Ebibono ebiroma biiti, "Bamubala ohuba omugwalaafu" sibabinandiiha hu Yibbulayimu yeŋene,

<sup>24</sup> aye ni neefe hwesi aba Hatonda alibala ohuba abagwalaafu olw'ohufugiirira huuti niye nj'owalamusa Yesu Musengwa weefe ohuŋwa mu bafu.

<sup>25</sup> Yesu oyo bamulyoŋayo era bamwita

---

\* **4:17 4:17** Tand 17:5      \* **4:19 4:19** Tand 17:17



olw'ebibi byefe aye Hatonda gamulamusa  
olw'efe ohwejeerera omusango.

## 5

### *Ohwejeerera omusango mu moni ja Hatonda*

<sup>1</sup> Olw'ohufa hwa Musengwa weefe  
Yesu Kurisito hwejeerera omusango  
olw'ohumufugiirira era njahani njalijo  
emiyaaya njagati weefe ni Hatonda.

<sup>2</sup> Olw'ohufugiirira Kurisito hy'anjeeerera Ha-  
tonda ohutuñambira ehiasabirisi era husuubira  
huuti luliba lulala hwaba mu bulamu wuwe  
ow'ejono.

<sup>3</sup> Si c'ehyo hyonene aye humeedaho  
n'ohusanalya mu hubonaabona  
olw'ohufugiirira Kurisito ohu banamaani  
batwosaho olwohuba hituleetera ohwega  
ohwehaliiriha,

<sup>4</sup> ng'ohwehaliiriha ohwo hutuñeererera  
ohuba n'obulamu obusangaasa Hatonda,  
ng'ehyo hituleetera ohuba n'esuubi huuti  
Hatonda alituhwehulira ejono lirye.

<sup>5</sup> Esuubi eri huli ni nalyo mu hihuumiri-  
iye eramu, humanyire huuti Hatonda saananga  
hutujuha olwohuba gatuna Omwoyo wuwe  
Omutukuvu ow'atuyombolera ohwenda huhwe  
mu myoyo jeefe.

<sup>6</sup> Ale ni hwali ni hutananga hwenonola,  
Kurisito gafa hu lwefe ababi mu hiseera ehira-  
gaane.

<sup>7</sup> Sihiboneha ana n'ana ohufiiririra omuutu  
omugwalaafu wayire nga njananga ohubaano  
owenayo ohufiiririra ahola ebiraji.

<sup>8</sup> Aye Hatonda galaga ng'olu atwenda olwohuba wayire nga hwali huhiri babi eyi ali, Kurisito gaatufiririra.

<sup>9</sup> Obanga ohufa hwa Yesu hwatuleetera ohutubala ohuba abagwalaafu, saaja hutunonola olu Hatonda aligudya abaatu n'ehirunji ehy'amaani?

<sup>10</sup> Olwohuba ni njaali ni njahiirino ehihooli njagati weefe ni Hatonda, Yesu Omwana wuwe ni gafa, ohufa huhwe hwatufaanania ni Hatonda. Ohufa huhwe ni huhenire ohutufaanania ni Hatonda, hulinonoha olw'ohulamuha huhwe!

<sup>11</sup> Si c'ehyo hyonene aye husanjalya n'ohusanjalya olwa Musengwa weefe Yesu Kurisito agira ni huli n'omuhumba ni Hatonda olw'ohutufaanania ni naye.

### *Kurisito n'Adamu*

<sup>12</sup> Ehibi hyaja mu hyalo olw'ohubbenga hw'omuutu omudaayi era n'ohufa hwosi hwaja olw'ehibi hy'omuutu oyo. Olw'ehyo ohufa nga humaamira abaatu bosibosi, olwohuba bosibosi baabbenga.\*

<sup>13</sup> Hatonda ko aje Musa amagambi, ehibi hyali hihenire ohuuja mu hyalo. Aye amagambi ni ganjumaño njajuma njanga ohugabbwaga.

<sup>14</sup> Atenga ohunwa hu Adamu ohwolera erala hu mulembe gwa Musa, abaatu beyongera ohufa ni hinjiramo ni naabo abatabbenga olw'ohubbwaga egambi lya Hatonda hy'Adamu. Era Adamu mu ngeri eyindi, gaali hyahuboneraho hya Yesu oyu baali ni bahuumiirira ohuuja.

---

\* 5:12 5:12 Tand 3:6

<sup>15</sup> Aye ehirabo hya Hatonda, nihyo hyanjabulo sihiri mwisa erala n'ohubbenga hw'Adamu. Olwohuba ng'olu ohubbenga hw'omuutu omulala oyo Adamu hwaleetera bangi ohufa era ni Hatonda aña abaatu bangi ehirabo hy'obulamu olw'ehisasabirisi hihye n'abasoniņa ebibi n'abita mu muutu omulala oyo Yesu Kurisito.

<sup>16</sup> Nindi ehirabo hya Hatonda ehyo sihiri hy'ohufa ohwaja olw'ehibi hy'Adamu ehyaaleetera abaatu bosibosi ohubasalira omusango. Aye ehirabo hihye ehyo hyaleetera bangi ohwejeerera omusango.

<sup>17</sup> Ohubbenga hw'Adamu hwaleetera abaatu ohufa. Aye olw'ehisasabirisi hya Hatonda ehibitirifu, ababala ohuba abagwalaafu era basuna obulamu obutanwanjo ni babita mu Yesu Kurisito.

<sup>18</sup> Ng'olu Hatonda gasalira abaatu bosibosi omusango olw'ehibi hy'Adamu, mu kola nj'enyene ohufa hwa Yesu\* hunjweramo bosibosi ohubabala ohuba bagwalaafu era basuna obulamu obutanwanjo.

<sup>19</sup> Ng'olu Adamu gajeema galeetera bangi ohufuuha babbengi mu moni ja Hatonda, n'obugondi wa Kurisito ohufa hu musalabba hireetera bangi ohubabala ohuba bagwalaafu.

<sup>20</sup> Hatonda gatanjo amagambi gayeede abaatu ohumanya baati babbengi. Aye abaatu aña baahoma ohubbenga ni Hatonda yeesi peyi gahoma ohweyongera ohubanjambira ehisasabirisi.

---

\* **5:18 5:18** Ebbayibbuli ejindi jiroma jiiti ehikolwa ehy'obugwalaafu.

21 Ng'olu ehibi hyanweramo abaatu ohufa, n'ehisasabirisi hya Hatonda hiityo panahyagama ohuleetera bangi ohubabala ohuba bagwalaafu. Hino hyabaleetera ohusuna obulamu obutanwanjo ohubita mu Yesu Kurisito Musengwa weefe.

## 6

*Huli hy'abafu eyiri ehibi aye balamu olwa Kurisito*

<sup>1</sup> Naahani hulome huutye? Hweyongere ohuhola ebibi ko Hatonda geyongere ohutanambira ehisasabirisi?

<sup>2</sup> Kadi nanadiidiri. Efe huli hy'abafu eri ebibi, hunanga huutye ohubigobolera nindi?

<sup>3</sup> Simumanyire muuti ni hwabatiziwa, hwabatiziwa ohulaga ti hwingira mu muhumba ni Yesu Kurisito era hwaba hy'abafiira njalala ni naye?

<sup>4</sup> Ni batubatiza hwali hy'abafuuye batusiha ni Kurisito, ko hibe ti ng'olu Semwana gamulamusa n'obunangi buwe, hwesi huutyo hwambale obulamu obunyaaha.\*

<sup>5</sup> Ale hanye ni batubatiza hwenjimba ni naye mu hufa, ananuma hubuusabuusa hwesi huja hulamuha hya niye.

<sup>6</sup> Humanyire huuti obulamu obuhwalimo owanembanga ohuhola ehibi babuhomerera hu musalabba njalala ni Kurisito ko hutagobolayo ohuba abeedu b'ehibi.

<sup>7</sup> Olwohuba omuutu anafa aba gejeereeye, ehibi sihimunuga.

---

\* 6:4 6:4 Kol 2:12

8 Olw'ehyo, ni huba ni hwafiira njalala ni Kurisito, huli n'ohufugiirira huuti huliba balamu ni naye.

9 Olwohuba humanyire huuti ng'olu Hatonda galamusa Kurisito, saalifa nindi era ohufa si-huhimuŋuga.

10 Gafa mulundi mulala olw'ebibi by'abaatu era sahigobolayo hufa nindi aye njahani mulamu njalala ni Hatonda.

11 Mu ngeri nj'enyene mwesi mwebone hy'abafu eyiri ehibi aye abalamu mu bulamu obunyaaha mu Yesu Kurisito. Ehyo hiŋeesa Hatonda eŋono.

12 Olw'ehyo, mutaganyanga ehibi ohubaŋuga ko mutagondera ohwegomba hw'emibiri jenywe.

13 Era mutaŋangayo ebitundu by'emibiri jenywe eyiri ehibi aye hy'abaatu abaali ni bafuuye balamuha baaba n'obulamu obunyaaha, mweŋeereyo erala eyiri Hatonda, abatambisenga ohuhola ebyo ebisaana.

14 Ehibi hitabaŋuganga olwohuba simuli njaaŋsi w'obuŋugi wa magambi aye muli njaaŋsi w'ehisasabirisi hya Hatonda.

*Hufuuhe beedu b'ebyo ebi Hatonda asiima*

15 Olwo njahani huhole hi? Hwegumye ohuhola ehibi olwohuba sihuli njaaŋsi w'amagambi aye w'ehisasabirisi hya Hatonda? Kadi naŋadiidiri!

16 Simumanyire muuti singa oba wenayeeyo ohuba omwidu w'omuutu ahuŋuge era hiityo po hiba? Olw'ehyo hiri eyi muli ohusalaŋo

ohugondera ehibi ehireeta ohufa oba ohuba abagondi hibafuule ohuba abasaana eyiri Hatonda.

<sup>17</sup> Cooka hweyaasa Hatonda olwohuba wayire mwalinga beedu b'ehibi, mwanjulira era mwafugiirira n'omwoyo mulala ebi babasomesa.

<sup>18</sup> Naahani bababonjolola mu maani g'ehibi era mwafuuha banjeeresa ba Hatonda ohuhola ebi asiima.

<sup>19</sup> Bino mbiroma ni tambisa ebibono ebinjamba hu huhola owiidu olwohuba hyangu ohubitegeera. Ng'olu mwenjerangayo erala ohuhola ebibi, mwenjeereyo erala muutyohuholanga ebirani ebiraga biiti muli bagwalaafu.

<sup>20</sup> Ni mwali ni muhiiri beedu b'ehibi, mwali mwetaaya ni mutananga ohuhola ebi Hatonda asiima.

<sup>21</sup> Hirani hi ehi mwasuna mu huhola ebyo ebi banjamba esoni naahani? Ebiitu ebyo binjwamo ohufa.

<sup>22</sup> Aye naahani ng'olu Hatonda gababonjolola mu wiidu eyiri ehibi era mwafuuha hy'abeedu eyi ali. Hino hibanjweramo obugwalaafu hyabaleetera obulamu obutanwano.

<sup>23</sup> Ohufa nj'omuhemba gubanja omuutu ahola ehibi aye obulamu obutanwano nj'ehirabo ehi Hatonda agaba ohubita mu Yesu Kurisito Musengwa weefe.

## 7

*Obufumbo ng'ehy'ohuboneraho*

<sup>1</sup> Aboluganda, ehi nenda ohulomaho hiri mu magambi aga mufaania. Simumanyire muuti amagambi ganuga omuutu n'ahiiri mulamu?

<sup>2</sup> Ehy'ohuboneraho, omuhasi omufumbo, wamwe amunuga n'ahiiri mulamu. Aye wamwe anafa, egambi ly'obufumbo liba sirihinuga muhasi oyo.

<sup>3</sup> Olw'ehyo, omuhasi anafumbirwa omusinde owundi wamwe ola n'ahiirino, omuhasi oyo aba muhwedi. Aye wamwe anafa, egambi eryo liba sirihimuwoŋa. Era singa afumbirwa omusinde owundi, aŋo saaba n'aholire obuhwedi.

<sup>4</sup> Aboluganda, pohiri hiityo n'eyiri enywe mwesi. Mwejeerera amagambi ohubanuga olu mwafiira ŋalala ni Kurisito. Olwohuba muli bimesu by'omubiri gwa Kurisito era ni gafa hu musalabba mwesi mwafa. Olw'ehyo, ŋaahani muli b'oyo owalamuha ko munange ohuhola ebirani ni munjeeresa Hatonda.

<sup>5</sup> Aye ohwegomba hw'omubiri ni hwali ni huhitunuga, amagambi gajeerereranga omwoyo ohwegomba ohuhola ebibi ohwo hwatambisa emibiri jeefe, nga huhola ebitwosa hu hufa.

<sup>6</sup> Aye ŋaahani ohwema olu hwafiira ŋalala ni Yesu hu musalabba era sihuhiiri ŋaasi w'amagambi ago agaali ni gatuwoonjire. Batwejeeresa obusibe w'amagambi hunange ohunjeeresa Hatonda mu kola epyaha ni hubita mu Mwoyo Omutukuvu, ekola eyitali yira ekale ey'ohugenderanga mu magambi aga banandiiha.

*Amagambi n'ehibi*

7 Olwo ŋaahani hulome huuti amagambi mabi? Kadi naŋadiidiri! Olwohuba hu lwange aŋaŋuma magambi sinahamanyire ehibi nj'ehiina. Ni ŋahatabaayeno egambi eriroma liiti, "Siwegombanga hiitu hyabeene." Sinahamanyire ti ohwegomba ehyabeene hibi.\*

8 Aye ehibi hyatambisa ekabi ohuŋwa hu gambi eryene eryo, hyandeetera ohwegomba ohwa hiisi ngeri. Olwohuba aŋaŋuma magambi ehibi sihiba n'obulomere.

9 Ni naali ni kiiri hufaanina ehi amagambi galagira, naali ndibulaŋi. Aye ni nagategeera, ng'ehibi hyeta aŋalafu,

10 era nga ko faania ti egambi eryali eryohunjeeda sune obulamu, mu butuufu lyali lipira mu hufa.

11 Olwohuba ehibi ni hyasuna ekabi ey'ohundulinga ni hibita mu hiragirow, nga hindeteera ohufa.\*

12 Wayire hiri hiityo amagambi nigo mawufu era n'ebiragirow byosi byabufu, bituufu era birani.

13 Naahani hulome huuti amagambi malaŋi nindi nj'agapweramo ohufa? Kadi naŋadiidiri. Aye ehihulu hiri hiiti ehibi ko hibonehere erala hiiti hibi, hitambisa ehiraŋi ohupweramo ohufa.

### *Ohuŋiriŋana n'ehibi mu bulamu w'omuutu*

14 Humanyire huuti amagambi gaŋwa ewa Hatonda aye neyagaana ni kolire eby'omubiri era ndi mwidu w'ehibi.

---

\* 7:7 7:7 Huŋ 20:17 \* 7:11 7:11 Tand 3:13



15 Ehi kola sikitegeera olwohuba ehi nenda ohuhola si c'ehi kola aye neyagaana ni kolire ehi tenda kole.

16 Mu ngeri eyi kola ehitahendire kole, hindeetera ohufugiirira ti amagambi nigo malaŋi.

17 Aye puma ngeri yosiyosi olwohuba ehibi ehiri mu ese nj'ehigira ni kola ehitahendire kole.

18 Manyire ti mu ese puma hiraŋi hyosihyosi, olwohuba ng'omuutu wayire nenda ohuhola ehiraŋi, sipanga huhihola.

19 Olwohuba ehiraŋi ehi nenda ohuhola si c'ehi kola aye neyagaana ni kolire ehibi ehitahendire kole.

20 Naahani nimba ni kola ehi tahendire kole, sindiise aba nahiholire aye ehibi ehiri mu ese.

21 Olw'ehyo, neyagaana ehyo ni hiri nj'ehindiho. Nimba ni nenda kole ehiraŋi neyagaana ehibi ni hiri nj'ehyetaayeno.

22 Cooka mu mwoyo gwange sangaalira amagambi ga Hatonda.

23 Aye mu mubiri mbona egambi ery'enjabulo ni litamba era ni lijirinania egambi lya Hatonda mu bineego byange, hino hindeteera ohuhola eby'omubiri.

24 O, nga mbweneweene! Nj'ani alinoŋola mu mubiri guno ogwijuuye ehibi era oguupira mu husihiiriha?

25 Neyaasa Hatonda olwohuba mu Yesu Kurisito Musengwa weefe, punuha ohuŋwa mu higosi hino!

Naahani po ndi tyo. Mu mwoyo gwange ne-manyire ti ndi n'ohuhola ehi gambi lya Hatonda

liroma aye omubiri gupalula gwapira ohuhola ebi ehiragiyo hy'ohuhola ehibi hiroma.

## 8

*Obulamu ow'omuutu oyu Omwoyo Omutukuvu atangirira*

<sup>1</sup> Nahani abaatu abali mu Yesu Kurisito, banuma musango

<sup>2</sup> olwohuba mu Yesu Kurisito, Mwoyo gaapa\* edembe era ehibi n'ohufa sibihinuga bulamu wange.

<sup>3</sup> Amagambi gaali sigananga hutunonola olw'ohwegomba hw'omubiri. Aye Hatonda gatuma Omwana wuwe naali n'omubiri hy'ogwomuutu ko ahene anangule ehibi ehi magambi gaali ni gatananga huhola olw'ohwegomba hw'omubiri.

<sup>4</sup> Yesu Kurisito gahihola, ko efe aba ohwegomba hw'omubiri hutatangirira aye Omwoyo Omutukuvu nj'atutangirira, hwahoheresa ebi magambi gatulagira.

<sup>5</sup> Abo aba ohwegomba hw'omubiri hunuga, banemba hu hola eby'omubiri aye abo aba Omwoyo Omutukuvu anuga, banemba hu hola ebi asiima.

<sup>6</sup> Ohunemba ohuhola ebi mubiri gwegomba hihwosa hu hufa. Aye onahola ebi Omwoyo Omutukuvu asiima, oja husuna emiyaaya n'obulamu obutanwanjo.

---

\* **8:2 8:2** Ebbayibbuli ejindi jiroma jiiti Mwoyo gahuja.

<sup>7</sup> Omuutu oyu hwegomba hw'omubiri hunjuga aba mulabe eyiri Hatonda era saananga hugondera magambi gage.

<sup>8</sup> Abo aba ohwegomba hw'omubiri hunjuga sibananga husangaasa Hatonda.

<sup>9</sup> Omwoyo wa Hatonda n'aba n'amenyire mu nywe, naahani nj'obanuga sosi ohwegomba hw'omubiri. Era oyo anjuma Omwoyo wa Kurisito mu bulamu wuwe, si wuwe.

<sup>10</sup> Kurisito n'aba n'amenyire mu bulamu wenywe, wayire emibiri jenywe jinahafe olw'ehibi aye Omwoyo abanja obulamu olwohuba Hatonda ababala ohuba abagwalaafu.

<sup>11</sup> Hanye Omwoyo wa Hatonda owalamusa Yesu Kurisito amenyire mu bulamu wenywe, mwesi alibalamusa.

<sup>12</sup> Olw'ehyo naahani balebe mu Kurisito, huli n'ebbanja. Aye ohwegomba hw'omubiri sinje ohutubanja ohuhola ebigwenda.

<sup>13</sup> Ohululuhanira ohuhola ebi hwegomba hw'omubiri gwenda hireeta ohufa. Aye Omwoyo anabanja amaani mwanangula ehibi, muba n'obulamu obusangaasa Hatonda.

<sup>14</sup> Olwohuba abo aba Mwoyo wa Hatonda alunjama, nj'abaana babe.

<sup>15</sup> Omwoyo oyu Hatonda gabanja saabaleetera obuti aye gabafuula abaana babe era huli n'obugumu ohulanga Hatonda huuti "Bbaabba."\*

<sup>16</sup> Omwoyo wuwe omwene atuhahasa mu myoyo j'efe ati huli baana ba Hatonda.

---

\* **8:15 8:15** Mar 14:36; Bag 4:6

17 Ni huba ni huli baana babe, hulisuna ebyo ebi gasuubisa abaatu babe era hulisunira ŋalala ni Kurisito ebi Hatonda gamutegehera. Ni hubonaabonera ŋalala ni Kurisito, balitunjeera ŋalala eŋono ni naye.

*Eŋono eri hunahabe ni nalyo*

18 Mbona ng'ebiguudyo ebi hubitamo hatyane, sihunanga hubigeragerania n'eŋono eri Hatonda alitunja.

19 Ebitonde byosibyosi bihuumiriyee era ni byesunga ohwola hu ludaalo olu Hatonda alihwehulayo abaana babe.

20 Ebitonde sibyeendeeye ohutoheresa ehigendererwa hya Hatonda aye omwene nj'owasalaŋo bibe biityo.\*

21 Ebitonde ebyo bisuubira ohubinunula mu hufa olu Hatonda aliŋa abaana babe eŋono n'edembe.

22 Humanyire huuti ebitonde byosibyosi ohwola hatyane bibinda n'obulumi hy'omuhasi alumwa ohusaala.

23 Sibitonde byoŋene aye ni neefe abaasuna Omwoyo Omutukuvu ng'ehirabo ehi Hatonda atagihiraho ohutunja. Hwesi hubinda mu myoyo jeeffe n'obulumi. Hwesunga era huhuumiirira Hatonda ohutununula atunje emibiri ejitafa ohulaga ng'olu huli baana babe.

24 Ng'olu gatunoŋola, hwesunga era husuubira ohutununula. Aye ehi osuubira onaba n'ohibonaho, ohwo sihuba husuubira

---

\* 8:20 8:20 Tand 3:17-19

naṅadiidiri. Nj’ani asuubira ehyo ehi aba n’anambire mu ngalo?

<sup>25</sup> Aye ni husuubira ohusuna ehi hutabonaho, huhuumirira n’ohwehaliriha.

<sup>26</sup> Mu ngeri nj’enyene, Omwoyo Omutukuvu atuyeeda mu budoto weefe ow’ohutamanya husaba bulani. Aye Omwoyo omwene oyo atulombera n’ohubinda mu ngeri eyi otaṅanga huloma n’ebibono.

<sup>27</sup> Hatonda oyo abona emyoyo j’abaatu, amanyire Omwoyo ehi aba n’atulombera efe abafugiirira.

<sup>28</sup> Humanyire huuti mu hiisi hiitu ehitwolaho, Hatonda agira efe abamwenda hyatunweramo ehiraṅi ng’olu husiima huhwe huli.

<sup>29</sup> Ko Hatonda atonde ehyalo, gamanya abaatu babe era gabalanga gahena gatobola ni genda bafaane n’Omusaani wuwe, ko Omusaani wuwe oyo ahene abe omudaayi mu balebe eduuli.

<sup>30</sup> Abo aba Hatonda gatobola gahena gabalanga era gababala ohuba abagwalaafu ng’abaṅa n’edaala ery’eṅono.

### *Ohwenda hwa Hatonda mu Yesu Kurisito*

<sup>31</sup> Naahani ehyo hunahiromeho hi? Hatonda anaba hu lubega lwefe, nj’ani aṅanga ohutunjirania gatuṅanga?

<sup>32</sup> Hatonda owanayo Omusaani wuwe ohufa hu lwefe hwesihwesi, olw’ehisasabirisi hihye saalituṅa ebiitu byosibyosi ebihwenda?

<sup>33</sup> Nj’ani aliṅaṅabira aba Hatonda gatobola? Mbona ti Hatonda omwene oyo nj’obabala ohuba abagwalaafu.

<sup>34</sup> Nj’ani alibasalira omusango? Enjuma wayire mulala. Olwohuba Yesu Kurisito owaafa era galamuha gehaaye mu hifo ehy’ejono hu lubega lw’omuhono omulungi ogwa Hatonda atunoherehesa.

<sup>35</sup> Naahani nj’ani ananga ohutwabuhania ni Kurisito galeheraŋo ohutwenda? Huba n’ebigosi oba baatu hutuhiyaania, hunjuma hyahulya oba hugenda majula, baatu hu tutisatiisa oba hwenda hutwita?

<sup>36</sup> Ng’olu hyanandiihiwa hiiti;  
“Hiisi ludaalo batwehoyera ohutuhenanjo hu lulwo.  
Batubisya hy’etaama eyi baja husala.”\*

<sup>37</sup> Aye mu ebyo byosibyosi, huli n’obunjangusi ow’amaani olwa Yesu Kurisito atwenda.

<sup>38</sup> Kahahisa erala ti wayire ohufa oba huba mulamu, bamalayika oba emisambwa, ebiriŋo hatyane oba ebiribanjo mu moni eyo, wayire amaani g’emisambwa

<sup>39</sup> agaholera namugulu mu bbanga oba njaasi hu hyalo oba ehitonde hyosihyosi, sibiŋanga hututusaho hwenda ohu Hatonda atwenda mu Yesu Kurisito Musengwa weefe.

## 9

### *Hatonda gatobola Abayisirayiri*

<sup>1</sup> Ndoma amazima mu Kurisito sindulinga, n’Omwoyo Omutukuvu gakahasa mula mu mwoyo gwange ati ehi nja huloma hituufu.

<sup>2</sup> Ndi n’ohunyolwa hungi hu mwoyo gwange olw’Abayudaaya bahyange.

---

\* 8:36 8:36 Zab 44:22

<sup>3</sup> Era nahendire mbe ndiise ofuuha ehy'embihho era omusuule eyiri Kurisito ni hiba ni hireetera abalebe bange abegwanga lyange abo ohunoŋoha.

<sup>4</sup> Abalebe bange Abayisirayiri abo, mbaba Hatonda gaŋa ekabi ohuba abaana babe, mbaba gabonehera baabona eŋono lirye n'emoni jaawe, mbaba gahola ni nabo endagaano. Mbaba gaŋambya amagambi gage gaahena gabalegera n'engeri ey'ohumujumiryanga mu Yekaalu era mbaba gaŋa ebisuubise ebiŋamba hu bunonoŋosi.\*

<sup>5</sup> Nibo nj'abaŋwa mu lulyo lw'abahale omu ebiha by'abaatu bosibosi bisimuha. Ni Kurisito oyu basaaye hy'omuutu osimuha mu lulyo lwawe ate nje Hatonda aŋuga byosibyosi oyu banajumiryenga emirembe n'emirembe. Amiina.

<sup>6</sup> N'aloma tyo sihitegeesa hiiti Hatonda si-gooheresa ebi gabasuubisa olwohuba sihiisi abaŋwa mu lulyo lwa Yisirayiri bosibosi oti baatu ba Hatonda.

<sup>7</sup> Wayire bamu lulyo lwa Yibbulayimu, sihitegeesa hiiti bosibosi bejuhulu babe, endiho. Aye hyaŋandiihiwa hiiti "Mu Yisaka nj'omwolisunira abejuhulu aba nahusuubisa."\*

<sup>8</sup> Mu ngeri eyindi, abaatu ba Hatonda sinje abaŋwa mu lulyo lwa Yibbulayimu hyoŋene aye abo abafugiirira ehisuubiso hihye ng'olu Yibbulayimu gafugiirira ehi Hatonda gamusuubisa.

<sup>9</sup> Malayika ni gaali n'abalomera ehisuubiso galoma ati, "Mu hiseera ehiragaane aŋa nahagob-

---

\* 9:4 9:4 Hunj 9:4 \* 9:7 9:7 Tand 21:12

olere omwaha oguuja, Saala anaahabe asundya omwana omuseere.”\*

<sup>10</sup> Si c’ehyo hyonene, omuhasi wa Yisaka oyu balanganga baati Labbeka gasaaye abaana.

<sup>11</sup> Aye abaana abo ni baali ni bahiiri hubasaala era ni bahiiri huhola ehiraŋi oba ehibi,

<sup>12</sup> Hino hyali hiityo ko bahahase baati Hatonda atobola oyo oyu aba ni gendire n’atemire hu ebyo ebi aba n’aholire. Hatonda galoma Labbeka ati, “Omuhulu aja huba muŋeeresu womuŋere.”\*

<sup>13</sup> Hyaŋandiihiwa hiiti, “Nenda Yakobbo aye nasuula Esawu.”\*

<sup>14</sup> Naahani olwo hulome huuti Hatonda gehub-bira? Kadi naŋadiidiri.

<sup>15</sup> Olwohuba Hatonda omwene galoma Musa ati, “Ese saasira oyo oyu mba ni nendire ohusaasira era naŋambira ehisasabirisi oyo oyu mba ni nendire ohuŋambira ehisasabirisi.”\*

<sup>16</sup> Olw’ehyo, Hatonda saanambira muutu yesiyesi ehisasabirisi olw’ohwefaaho oba olw’ebikolwa ebi aba n’aholire aye omwene nj’osalano ow’ohuŋambira ehisasabirisi.

<sup>17</sup> Ehyaŋandiihiwa hiroma Falaawo hiiti, “Nahuhusa nahuŋa obuhulu olw’ohwenda ohulaga amaani gange mu ewe era ng’olu ndi n’obuŋangi mu hyalo hyosihyosi.”\*

<sup>18</sup> Olw’ehyo, Hatonda asaasira oyo oyu aba ni gendire ohusasira era ahahadasa omwoyo gw’oyo oyu aba ni gendire ohuhahadasa.

\* **9:9 9:9** Tand 18:10 \* **9:12 9:12** Tand 25:23 \* **9:13 9:13** Mal

1:2-3 \* **9:15 9:15** Hunj 33:19 \* **9:17 9:17** Hunj 9:16



*Ehiruŋi n'ehisa hya Hatonda*

<sup>19</sup> Naahani oŋangire ohuloma oti, “Obanga pohiri hiityo, lwahiina Hatonda atunenya? Nj’ani aŋanga ohuŋahania ehi aba ni gendire ohuhola?”

<sup>20</sup> Aye ewe omuutu obuutu, ndiwe ani ohubuusa Hatonda hu kola yiye? Ehiwumbe obuwumbe hiŋanga hiitye ohubuusa owahi-wumba hiiti, “Lwahiina wamumba oti?”

<sup>21</sup> Omuwumbi saaba n’ehiyale ehy’ohuwumba hyosihyosi ehi aba ni gendire mu hitole hy’eroba lirye? Mwiroba nderyene saananga husalaŋo gawumbamo ebyohutambisa ebitula aŋa naaŋa n’ebitula olubalira?

<sup>22</sup> Ni Hatonda yeesi c’ehi ahola. Gendire ohu-laga ehiruŋi ehibitirifu n’amaani gage eyiri abo aba gaali n’aja ohusihiirisa aye gabehaliiriha.

<sup>23</sup> Hino gahihola ni genda ohulaga eŋono lirye ebitirifu eyiri abo aba galitegeehera ohuŋwa ahale nahale era abanambira ehisasabirisi.

<sup>24</sup> Abaatu abo ko ndiife aba galanga, simu Bayudaaya boonene aye n’Abatali Bayudaaya.

<sup>25</sup> Ng’olu Hatonda omwene aloma mu hitabo hya Kosiya ati,  
 “Abatali baatu bange,  
 ndi balanga baatu bange.  
 Abaatu abaali abasuule,  
 ndi balanga bahoda.\*

<sup>26</sup> Mu hifo ehyene ehyo omu babalangira baati,  
 ‘Simuli baatu bange’  
 nj’omu banahabalangirire baati,

---

\* 9:25 9:25 Yis 29:16; 45:9

'Abaana ba Hatonda Omwene Bulamu.' ”\*

<sup>27</sup> Ni Yisaaya galira Yisirayiri amangi ati, “Wayire Abayisirayiri bangi bali hy’omujehe ogw’ohunyanja ogutabaliha, abanahanonjohe banaahabe badiidiri beene.

<sup>28</sup> Olwohuba Hatonda Musengwa ananjuma hwemoota anahasalire abaatu omusango era abagudye ananjuma hubagoboleramo.”\*

<sup>29</sup> Era Yisaaya omwene oyo gaaloma ati, “Singa Musengwa Omunugi w’ebiitu byosi sigatuleherahuno abaatu ab’olulyo lwefe, hani hwasihiiriha hy’abaatu abomu bibuga Gomora ni Sodoma.”\*

*Ohutafugiirira hw’Abayisirayiri*

<sup>30</sup> Naahani hulome hiina? Hatonda gabala Abatali Bayudaaya abetefuuyeho ohwendula ohuba abagwalaafu olw’ohumufugiirira,

<sup>31</sup> aye Abayisirayiri abagesyaho ohuba abagwalaafu olw’ohuhuuma amagambi, sibabusuna.

<sup>32</sup> Ne lwahiina sibabusuna? Sibabusuna olwohuba sibabwendulira mu ngira ey’ohufugiirira wabula babita mu bikolwa byawe. Ehyo hyabaleetera ohwegumula hu oyo ali “hy’ebaale eri begumulaho.”

<sup>33</sup> Ng’olu hyanandiihiwa hiiti; “Bona taaye ebaale mu Sayuuni, ebaale egumu erireetera abaatu ohwegumula, olwanda oluja hubaleetera ohwehubbirano omunyiha.

Era hiisi amwesiga saanahaswale.”\*

---

\* 9:26 9:26 Kos 1:10 \* 9:28 9:28 Yis 10:22-23 \* 9:29 9:29 Yis 1:9 \* 9:33 9:33 Yis 28:16

## 10

<sup>1</sup> Aboluganda, ehi mwoyo gwange guṅembaho bugali era ehi saba hiri hiiti Abayisirayiri banonjohe.

<sup>2</sup> Manyire ti bafubaho ohuṅa Hatonda enono aye simukola endani.

<sup>3</sup> Sibamanyire engeri ey’ohusunamo obugwalaafu ohuṅwa ewa Hatonda aye bagesyaho ohusegano engira yaawe hu waawe ohuba bagwalaafu.

<sup>4</sup> Kurisito gooheresa ehigendererwa hy’amagambi ko hiisi amufugiirira bamubale ohuba mugwalaafu.

*Obuhwenda ow’ohunonjoha eyiri abaatu bosi-bosi*

<sup>5</sup> Musa ganandiiha ati omuutu anegumyenga ohwoheresa amagambi n’ebiragiro anabengano olw’ohubyoheresa.\*

<sup>6</sup> Aye obugwalaafu obuuja olw’ohufugiirira, omuutu sigebuusa ati, “Nj’ani anahatiine mwigulu atuseyo Kurisito amuleete hu hyalo atuyeede?”

<sup>7</sup> Oba ohwebuusa ati, “Nj’ani alitiina e magombe atuseyo Kurisito ohuṅwa mu bafu?”

<sup>8</sup> Naahani obuhwenda obuṅamba hu bugwalaafu obu muutu asuna olw’ohufugiirira buli buuti, “Ehibono hya Hatonda hiri huupi ni neewe. Hiri mu hanwa nomu mwoyo gugwo.” Ehyo nj’ehibono ehi hubuulira abaatu.

<sup>9</sup> Singa waatula n’omunwa gugwo oti Yesu nje Musengwa n’otayeho n’ohufugiirira mu

---

\* 10:5 10:5 Leev 18:5

mwoyo gugwo oti Hatonda gamulamusa mu bafu, ononjoha.

<sup>10</sup> Olwohuba omuutu afugiirira n'omwoyo gugwe ko bamubala ohuba omugwalaafu era ohunonjoha, geyatulira n'omunwa gugwe omwene ati anonjohire.

<sup>11</sup> Ng'olu ehyandiihiwa hiroma hiiti "Hiisi amwesiga saanahaswale,"\*

<sup>12</sup> Enjuma njabulo njagati bw'Omuyudaaya n'Atali Muyudaaya. Hatonda nje Musengwa ya bosibosi era agaba ekabi abo bosibosi abamusaba.

<sup>13</sup> Era hyandiihiwa hiiti; "Hiisi aliranga Musengwa n'amusunga ohumunonjola, ali munonjola."

<sup>14</sup> Aye basunga baatye oyo oyu bahiiri hufugiirira, ohubanonjola? Era banjanga baatye ohumufugiirira ni bahiiri hunjulirangaho ebi munambaho? Nindi banjanga baatye ohunjulira ebimunambaho ni njajuma muhwenda obalomeeye?

<sup>15</sup> Era abahwenda batiina baatye ohubalomera ni njajuma obatumire? Hyandiihiwa hiiti, "Nga hiraŋi abaatu abatulomera Amanjulo Amalaŋi ohutuhyalira!"\*

<sup>16</sup> Aye abaatu bosibosi sibafugiirira Amanjulo Amalaŋi ago. Yisaaya aloma ati, "Musengwa, nj'ani afugiirira obuhwenda weefe?"\*

<sup>17</sup> Ohufugiirira huuja olw'ohunjulira Amanjulo Amalaŋi aganjamba hu Kurisito.

---

\* **10:11 10:11** Yis 28:16 \* **10:15 10:15** Yis 52:7 \* **10:16 10:16**  
Yis 53:1

18 Aye hambuuseho, mu butuufu sibanjulira obuhwenda owo? Ehituufu hiri hiiti banjulira, ng'olu ehyanandiihiwa hiroma hiiti; "Ejanjaasi lyabyo lihwana ehvalo hyosihyosi era n'ebibono byawe hiisi muutu gabinjulira."\*

19 Nindi hambuuse, Abayisirayiri sibategeera? Bategeera. Musa omwene galoma ati, "Nja hubaleetera ohugongeera olw'abaatu aba mujeega muuti mbo banjuma punga yiita hiswa, nja hubaleetera ohuluna olw'abaatu abanjubeebe."\*

20 Era Yisaaya n'obugumu gaaloma ati, "Abo abatanyendulangaho baahena bambona. Era nehwehulira abo abaali ni baatasungire."\*

21 Aye ehinjamba hu Yisirayiri aloma ati, "Nahena etenjama ey'amaani ni nangirisa abaatu abajeemu baaje eyi ndi aye bageene."\*

## 11

### *Ehisa hya Hatonda eyiri Abayisirayiri*

1 Naahani hambuuseho, kaho Hatonda gahubba Abayisirayiri omugongo? Kadi nanadiidiri. Ese aloma ono, ndi Muyisirayiri omwjuhulu wa Yibbulayimu ohunwa mu hiha hya Bbenjamini.

2 Hatonda sigahubba abaatu babe abo omugongo, abagatobola ko ahene atonde ehvalo.

---

\* 10:18 10:18 Zab 19:4 \* 10:19 10:19 Mag 32:21 \* 10:20  
10:20 Yis 65:1 \* 10:21 10:21 Yis 65:2

Simumanyire ehyanandiihiwa ehiroma hu Eliya ng'olu galoma hu Bayisirayiri ati,

<sup>3</sup> “Musengwa, beetire abanaabbi babo era babbwagabbwaga ebituuti bibyo ohubaneera enongo. Ndiise osigaaye era keesi bali hupiima benda bakenejo.”\*

<sup>4</sup> Aye Hatonda gamugobolamo atye? Gamuloma ati, “Ndiño n’abaatu kasanvu abagaana ohuhubira Bbaali amafuha.”\*

<sup>5</sup> Era pohiri nomu ndaalo jino. Naliño badiidiri beene aba Hatonda gatobolamo olw’ehisasabirisi hihye.

<sup>6</sup> Hatonda naaba ni gabatobola olw’ehisasabirisi hihye, ehyo hiba hitegeesa hiiti sigabatobola olw’ebikolwa byawe ebirani. Hiba ni hyali hiityo, ehisasabirisi hihye hyahali sihyihiiri hisasabirisi.

<sup>7</sup> Naahani Abayisirayiri bendire Hatonda ohubabala ohuba abagwalaafu olw’ohuhuuma, amagambi aye sibahisuna ohutusaho abo abagatobola. Abandi baali n’emyoyo emihahadafu.

<sup>8</sup> Ng’olu hyanandiihiwa hiiti, “Hatonda gabalehera obuñubeebe ohubanuga. Gabana emoni aye sibabona, n’amatwi aye sibanjulira n’ohwola hatyane.”

<sup>9</sup> Ni Habaha Dawudi galoma ati,  
 “Leha ebiinulo byawe  
 bibafuuhire omutego,  
 bibe ebaale ery’ohwegumulaho era  
 ehy’ohwegalula.\*

\* 11:3 11:3 1 Bah 19:10,14  
 11:9 Zab 69:22-23

\* 11:4 11:4 1 Bah 19:18

\* 11:9

<sup>10</sup> Leha emoni jaawe jiijeho olubooha  
batabona n’ohubona,  
n’emigongo jaawe  
jigodame emirembe n’emirembe.”

<sup>11</sup> Nindi hambuuseho, olwo Abayudaaya ni bageene ohufugiirira basihiirihira erala? Bbe aye ohubbenga hwawe hyaleetera ab’Abatali Bayudaaya ohunojoha, ko hiñweremo Abayudaaya abo ohugongeera.

<sup>12</sup> Ohubbenga hwawe hwagira Abatali Bayudaaya basuna ekabi mbitiirifu. Aye hija huba hibitiirifu Abayudaaya ni balifugiirira Kurisito.

*Ohunojoha hw’Abatali Bayudaaya*

<sup>13</sup> Naahani handome ng’olu ndi muhwenda wenywe, obuñeerese wange eyiri enywe Abatali Bayudaaya bunesiimisa,

<sup>14</sup> hamunga hyahaleetera abandi hu balebe bange Abayisirayiri ohunojoha.

<sup>15</sup> Obanga Hatonda ohuhubba Abayudaaya omugongo hyafaanania Abatali Bayudaaya ni naye, hinahabe hiitye olu Hatonda alibasangalira olu baligobola eyi ali? Hiriba oti hani hulamuha.

<sup>16</sup> Onaŋonga ehitole hy’etome ly’engaano eyiri Hatonda, hitegeesa hiiti etome eryo lyosiryosi liba lyawufu olwohuba olinjongireeyo. Era n’ehiholo hy’omusaala onahinongayo, n’amasaga goosi gatiiniraho.\*

<sup>17</sup> Aye singa amasaga ag’omusaala omuzayiti bagatemaho, baahena bajomehaho olusaga

---

\* **11:16 11:16** Etome ly’engaano n’ehiholo bitegeesa Yibbulayimu ni Yisaka ko ni Yakobbo.

lw'omuzayiti ogwomwisugu, olusaga olwo luli-  
isiwa n'ehiholo hira. Mu ngeri nj'enyene weesi  
Otali Muyudaaya n̄aahani osuna omuganyulo  
nj'omwene hy'Abayudaaya.

18 Kale ewe oli hy'olusaga olu bajomehaho  
obujomehe otatalanga hiholo olwohuba oli  
lusaga busaga.

19 Aye oŋanga ohuloma oti, "Amasaga ago  
bahena hugatemaho ko banjomehaho."

20 Ehyo hituufu aye bagatemaho  
olw'ohutafugiirira Hatonda. Enywe  
babajomehaho olw'ohumufugiirira. Kale  
mwejomehe, mutepaahapaaha.

21 Olwohuba obanga Hatonda sigasaasira  
amasaga gala ameene hiholo, enywe ababajome-  
haho bujomehe muliŋonera n̄eena?

22 Olw'ehyo mwegenderese, wayire  
Hatonda ali n'ehisasabirisi, abamujeemera  
abahambun̄alira. Ali n'ehyere eyi muli  
singa mweyongera ohumwesiga. Aye ni  
munahamujeemere, mwesi anahabatemeho.

23 Era Abayudaaya abo ni banahaleheŋo obu-  
jeemu wabwe, Hatonda anahabagoboleremo  
gabajomeha hu hiholo nindi.

24 Enywe Abatali Bayudaaya muli hy'olusaga  
lula olw'omuzayiti ogwamera omwene bahena  
bagujomeha hu hiholo. Aye Abayudaaya  
nibo bali hy'omusaala omuzayiti ogubahoma  
huhoma. Olw'ehyo hyangu Hatonda ohubagob-  
osa hu hiholo ng'olu baali oludaayi.

*Ehisa hya Hatonda eyiri abaatu bosibosi*



<sup>25</sup> Aboluganda, nenda mutegeere ehyama ehiŋamba hu Yisirayiri ko mutan̄eega muuti mubahira. Abayisirayiri abandi basigaaye bahahadafu b'emyoyo ohwola olu obungi w'Abatali Bayudaaya buliŋwayo ni bafugiirira Hatonda. Obuhahadafu w'emyoyo jaawe wahaseera buseera.

<sup>26</sup> Ebyo ni biŋooye, Abayisirayiri bosibosi bali-noŋoha, ng'olu hyanandihiwa hiiti; "Omunon̄osi aliŋwa mu Sayuuni, alitusa abejuhulu ba Yakobbo mu bibi byawe.\*

<sup>27</sup> Era yino nj'enhabe endagaano yange ni nabo, olu ndibasoniŋa ebibi byawe."\*

<sup>28</sup> Abayisirayiri abo balabe ba Hatonda olwohuba sibafugiirira Amanuliro Amalaŋi ko enywe muganyulwemo. Aye olwa basehulu baawe, bahoda eri Hatonda era gabatobola.

<sup>29</sup> Hatonda sacuusa biŋeego bibye eyiri abo abatobola gahena gabaŋa ekabi.

<sup>30</sup> Ng'olu mwesi Abatali Bayudaaya ahale hale mwali bajeemu, ŋaahani Hatonda gabaŋambira ehisasabirisi olw'obujeemu w'Abayudaaya.

<sup>31</sup> Mu ngeri nj'enyene, ng'olu Hatonda gabaŋambira enywe ehisa, Abayudaaya boosi bajeemu ko Hatonda abaŋambire ehisa.

<sup>32</sup> Olw'ehyo, Hatonda galeha abaatu bosibosi baaba mu bujeemu waawe hy'abasibe ko abaŋambire bosibosi ehisa.

---

\* 11:26 11:26 Yis 59:20 \* 11:27 11:27 Yer 31:33-34

33 Nga Hatonda muninda! Enuma ananga ohutegeera amagesi n’ohumanya huhwe! Ebula otegeera ebi asalaŋo n’engeri eyi aholamo ebibye!\*

34 Ehyaŋandiihiwa hiroma hiiti;  
“Nj’ani amanyire  
ehi Musengwa ajeega?

Era nj’ani ananga ohumuŋa amagesi?\*

35 Nj’ani owaali n’anjolireho Hatonda  
ehiitu hyosihyosi ko abe n’ebbanja  
eryohusasula?”\*

36 Hatonda nj’owatonda ebiitu byosibyosi,  
nj’agira byabaŋo era birimuŋa enono. Abaatu  
bamuŋe enono emirembe n’emirembe. Amiina.

## 12

### *Engeri ey’ohuŋeeresamo Hatonda*

1 Naahani balebe bange, mbegayirira olw’ehisa hya Hatonda, mumuŋe obulamu wenywe bube enongo endamu eyi bamutobolera era emusangaasa. Eyo nj’engeri etuufu ey’ohumujumirya.

2 Mutebisyanga hy’abaatu b’ehyalo hino aye muganye Hatonda acuuse emyoyo n’epeega yenywe ko mufaanie ebi genda ng’olu biri ebi-ranji, ebisangaasa era ebyolereeye.

3 Olw’ehirabo ehi Hatonda gaapa olw’ehisasabirisi hihye, ndoma ti hiisi muutu hu enywe ateebona ati nj’ohihenaho ate nga ko paanaŋo. Aye geŋeegengaaho mu kola endanji

\* 11:33 11:33 Yis 55:8 \* 11:34 11:34 Yis 40:13 \* 11:35 11:35  
Yob 41:11

era geheberenga ni geema hu hufugiirira ohu Hatonda gamuṅa.

<sup>4</sup> Hiisi muutu ali n'omubiri mulala era ni guli n'ebimesu bingi aye ebimesu ebyo byosibyosi sibitamba mulimo nj'omwene.

<sup>5</sup> Mu ngeri nj'enyene, wayire nga huli bangi aye huli mubiri mulala mu Kurisito era hiisi muutu hu efe getaaga owahye.

<sup>6</sup> Huli n'ebirabo byenjabulo ng'olu Hatonda gatunṅa olw'ehisasabirisi hihye. Singa omuutu aba n'ehirabo ehy'obunaabbi, atiine mu moni n'ohulomera abaatu ehibono hya Hatonda n'afugiirira ati ali humulomeramo.

<sup>7</sup> Ni huba huṅeeresa, afubenga ohuṅeeresa n'omwoyo mulala, oba ohusomesa abaatu ba Hatonda, afubengaho ohubasomesa.

<sup>8</sup> Oyo ali n'ehirabo ehy'ohugobosangamo abahye amaani, afubengaho ohuhihola. Ali n'ehyohugaba, agabenga n'omwoyo mulala. Ali n'ehyobunugi, aṅugenga nahenereye. Ni nooyo ali n'ehyohulaga ehyere, aholenga atyo naali musangaafu.

<sup>9</sup> Ohwendana hwenywe hubenga hw'amazima. Mwenṅalenga ehibi era mwegumyenga ohuholera abaatu ebirani.

<sup>10</sup> Mwendanenga hy'abalebe era hiisi muutu aṅenga owahye eṅono.

<sup>11</sup> Mubenga baheneerefu era muṅeeresenga Musengwa n'omwoyo mulala.

<sup>12</sup> Esubi eri muli ni nalyo libaleetere ohuba n'esangaalo, mwehalirihenga mu bigosi ebi mu-bitamo era mulombenga hiisi haseera.

<sup>13</sup> Mubugulenga hu bimuli ni nabyo mwayeeda abafugiirira bahyenywe abanjuma hyahwenjambaho era musangaalirenga abageni mu mago genywe.

<sup>14</sup> Mutabanjwaba abo ababahiyaania aye mubasabirenga ekabi.

<sup>15</sup> Musanjalihisyenga njalala ni naabo abasanjalya era mulirisenga abo ababa ni bali hulira.

<sup>16</sup> Hiisi muutu amenyenga mu bulala n'abahye era mutehudumbasanga aye mube n'omuhago n'abaatu ab'edaala ery'anjaasi. Mutanjeeganga muuti mbo ndinywe omuhihenaho.

<sup>17</sup> Omuutu anahuhola ehibi, ewe otamwegalula. Muholenga ebi abaatu bosibosi basiima baati biranji.

<sup>18</sup> Mufubenga ng'olu hinjangiha ohuhola ebiitu ebireeta ohumenya mu miyaaya n'abaatu bosibosi.

<sup>19</sup> Bahyange, mutegalulanga muutu yesiyesi abahola ehibi aye muleherenga Hatonda omwene gaaba nj'obegalulira. Olwohuba Musengwa aloma mu hyanjandiihiwa ati,  
“Ohwegalula hwange, ndibesasula.”\*

<sup>20</sup> Ng'olu ehyanjandiihiwa hiroma hiiti,  
“Enjala yinaba ni yiruma omulabe wuwo,  
omuñanga emere galya  
era enduño yinaba n'emuluma  
omuñanga amaaji ganywa.  
Onahola otyo  
onahabe onjeesa amanda agaduha omuliro

---

\* 12:19 12:19 Mag 32:35

hu mutwe gugwe.”\*

<sup>21</sup> Ehibi hitabaŋangulanga aye muhinangule ni muhola ebiranji.

## 13

### *Muŋulirenga ababaŋuga*

<sup>1</sup> Mudembuhirenga abo ababaŋuga olwohuba obunugi wosiwosi buŋwa eyiri Hatonda. Era eŋuma muŋugi aŋuga, Hatonda n’atamutaayenjo.

<sup>2</sup> Olw’ehyo, hiisi agaana ohudembuhira abanugi aba ajemeeye ehi Hatonda gaatanjo era balimusalira omusango.

<sup>3</sup> Abaatu abahola ebiranji sibatya batangirisi baawe aye abo abahola ebibi batya ohubebonesa. Wenda ohumenya mu miyaaya n’abatangirisi babo? Ale hola ebiranji ebi baŋugi benda era baja huhuŋa eŋono.

<sup>4</sup> Abanugi baŋeeresa ba Hatonda hu lw’obulanji wenywe. Aye onaba n’ohola ebibi oli n’ohwenjenderera olwohuba abanugi baliŋo ohugudya abo abahola ebibi.

<sup>5</sup> Olw’ehyo, mubadembuhirenga, sirwohutya ohubagudya hyonene aye olwohuba muhimanyire mu myoyo jenywe muuti hiranji ohubadembuhira.

<sup>6</sup> Era ehyo c’ehigira ni musasula omusolo olwohuba abanugi banahola emirimo ejibagwene ohuhola baba baŋeeresa Hatonda.

---

\* **12:20 12:20** Nge 25:21-22

7 Musasulenga amabanja genywe, oba husasula omusolo oba epooza, ni hiba huṅa muutu eṅono muli muṅe.

### *Ohwendananga*

8 Mutabanga n'ebbanja lya muutu yesiyesi ohutusaho ebbanja ery'ohwendananga, olwohuba onenda owahyo oba woherehiise ehi amagambi galagira.

9 Amagambi galagira gaati, "Soholanga buhwedi, siwiitanga muutu wahyo, siwiibanga hiitu hyosihyosi, siwegombanga hiitu hyabeene," ko n'amagambi agandi gosigosi baganjimba lyaba erala lyonene eriroma liiti, "Yendanga omuutu wahyo ng'olu weyenda wamwene."\*

10 N'oba ni wenda owahyo, soonṅanga hu muhola hibi. Olw'ehyo onenda owahyo oba woheerehise ehi amagambi galagira.

11 Hino muhiholenga ni mumanyire muuti ehiseera hituṅoyeeho. Musisimuhe muṅwe mwiro esaawa yoolire, olwohuba ṅaahani ehiseera ehy'ohugobola hwa Musengwa weefe higereeye ohuhiraho aṅa hwatagihira ohufugirira.

12 Owiire bunatere ohwanuuha. Hulehe ohuhola ebikolwa eby'ehiirema hwambale ebisoosa eby'obutangaafu.

13 Hwebisyenga bulani hy'abaatu abomumwi, sosi huṅwera mu binyumo nomu bumeesi nomu buhwedi nomu hwejabaata nomu huduhanaduhana ko n'egongi.

---

\* 13:9 13:9 Huṅ 20:13-15,17

14 Aye mwambale Musengwa Yesu Kurisito anjuge obulamu wenywe ko mutoheresanga hwegomba hw'omubiri.

## 14

### *Mutasaliranga bahyenywe musango*

<sup>1</sup> Musangaalirenga owahyenywe atali mudimamu mu hufugiirira era mutanahananga ni naye hu biitu ebinamba hu ngeri eyi omuutu oyo aneega hu hino ni nahira.

<sup>2</sup> Abaatu abandi balya hiisi hiitu olw'ohufugiirira hwawe. Aye abandi abali n'ohufugiirira ohudiidiri balya eryani ery'amagala lyonene.

<sup>3</sup> Aye oyo alya hiisi hiitu atatalanga oyo otalya byosibyosi. Ni nooyo atalya ebiitu ebindi atasalira oyo alya hiisi hiitu omusango olwohuba Hatonda samwesamba.

<sup>4</sup> Ndiwe ani owoloobya omunjeeresa wabeene? Musengwa waawe nj'asalaŋo hanye ehi baholire hiraŋi oba hibi. Era olw'amaani ga Musengwa baja hunangula.

<sup>5</sup> Eriyo aneega ati oludaalo hirebe luhira oludaalo hirebe ohuba olwenjabulo, owundi ati endaalo josijosi jinjeranerana. Ese ndoma ti hiisi muutu agumirenga hu hyaneega ati nj'ehituufu.

<sup>6</sup> Oyo ahusa oludaalo hirebe ohuhira olundi, ahihola olw'ohuŋa Musengwa enono. Ni nooyo alya enyama, alya lwa Musengwa olwohuba geyaasa Hatonda. Ni nooyo atalya ahihola lwa Musengwa olwohuba yeesi geyaasa Hatonda.

<sup>7</sup> Enjume muutu hu efe alijo ohwesangaasa omwene. Era ni huba ni hufuuye oba ni huhiriyo balamu, enjuma ewenjuga omwene.

<sup>8</sup> Ni huba balamu, hubano lwa Musengwa. Era ni hufa, hufa hu lwa Musengwa. Olw'ehyo, mbo hufa mbo huba balamu, husigala ni huli baatu ba Musengwa.

<sup>9</sup> Olw'esonga enyene yino, Kurisito gafa gaa-hena galamuha ko abe Musengwa w'abalamu n'abafu.

<sup>10</sup> Naahani ewe otalya enyama, lwahiina osalira omulebe wuwo omusango? Ni neewe olya lwahiina otala mulebe wuwo otalya? Hwe-sihwesi hunahemeerere mu moni ja Hatonda ohutusalira omusango.

<sup>11</sup> Hyanandiihiwa hiiti;  
 "Musengwa aloma ati,  
 'ng'olu ndi Hatonda omwene bulamu,  
 hiisi muutu alikubbira amafuha.  
 Era hiisi muutu  
 alinjumirya olwohuba ndiise Hatonda.' ""\*

<sup>12</sup> Olw'ehyo, hiisi muutu anahenjoseho mu moni ja Hatonda omwene.

*Hutahola ebinanga ohugwisa abahyefe mu hibi*

<sup>13</sup> Naahani hulehere ano ohusalira abafugirira bahyefe emisango aye huhole ebiitu ebigira sibesitaala hugwa mu hibi.

<sup>14</sup> Ese manyire era kahasa ti mu moni ja Yesu Musengwa enjuma hyahulya ehy'embihho aye hiba hy'embihho eyiri oyo aneega ati hy'embihho.

---

\* **14:11 14:11** Yis 45:23



15 Singa ehi olya higira mulebe wuwo gesitaala, aṅo oba soohola ehiraga hiiti omwenda. Otagira mulebe wuwo oyu Kurisito gafiririra gaṅamba engira emujira mu husihiiriha olw'ehyo ehi olya.

16 Otaleha ehi omanyire oti hiraṅi ohufuuha ehiduhu eyiri abaatu abandi.

17 Obuṅugi wa Hatonda sihulya n'ohunywa aye huhola ebi Hatonda asiima, emiyaaya n'esangaalo ebi Omwoyo Omutukuvu atuṅa.

18 Oyo aṅeeresā Kurisito mu ngeri eyo, asangaasa Hatonda era n'abaatu bamusiima.

19 Olw'ehyo, hufubenga ohuhola ebireeta emiyaaya n'ebiyeeda hiisi muutu ohuṅangala mu hufugiirira huhwe.

20 Otonoona mulimo gwa Hatonda olw'ebiryō. Ebiryo byosibyosi birāṅi aye ehibi nj'ohulya ehyo ehireetera omuutu owundi ohwesitaala mu hufugiirira huhwe.

21 Hiraṅi ohutalya nyama wayire ohunywa omwenge gwomu mizabbibbu oba ehiitu ehindi hyosihyosi ehireetera omulebe wuwo ohugwa mu hibi.

22 Leha ehi ofugiirira oti hiraṅi ehiṅamba hu biitu ebyo, hisigale hyama hiho ni Hatonda. Ali bulāṅi oyo otesalira musango hu hyaṅeega ati hiraṅi.

23 Aye singa omuutu aba n'ohubuusabuusa, ehiitu ni himulumirisa ohutalya ehiitu aye gatiina mu moni gahirya, aba gesaliye omusango olwohuba ehiitu hyosihyosi ehi ohola n'oṅuma hufugiirira oti hiraṅi hiba hibi.

# 15

## *Husangaasenga abahyefe*

<sup>1</sup> Efe abadimamu mu hufugiirira, huyeedenga abo abali n’ohufugiirira ohudiidiri sosi ohuholanga ebiitu ohwesangaasa efe abeene.

<sup>2</sup> Hiisi muutu aholerenga abafugiirira bahye ebiitu ebi basangaasa era ebi baleetera ohujangala mu hufugiirira hwawe.

<sup>3</sup> Ni Kurisito yeesi ebi gaholanga, sigaholanga ohwesangaasa omwene aye ng’olu hyanandiihiwa hiiti, “Ebi baatu baaloma ni bahuduha byagobola hu ndiise.”\*

<sup>4</sup> Byosibyosi ebiri mu byanandiihiwa ahale bitwegeresa hube n’ohwehaliriha n’ohugobolamo amaani mu huhuumirira ebi Hatonda gasuubisa.

<sup>5</sup> Hatonda agira hwaba n’ohwehaliriha era gatugobosamo amaani, abaleetere ohuba n’obulala mu myoyo jenywe ni mweyongera ohufugiirira Yesu Kurisito,

<sup>6</sup> ko muyaalire njalala hy’amage mu hujumiryanga Hatonda semwana ya Musengwa weefe Yesu Kurisito.

<sup>7</sup> Hiisi muutu ganirisenga owahye ng’olu Kurisito gabaanirisa, ehyo hireetere abaatu ohuja Hatonda ejono.

<sup>8</sup> Olwohuba Kurisito gaaja ohujeeeresa Abayudaaya abahomole ohulaga ng’olu Hatonda ali mwesigwa owoheresa ebi gasuubisa abasehulu baawe,

---

\* 15:3 15:3 Zab 69:9

9 ko Abatali Bayudaaya bajumirye Hatonda olw'ehisa hihye. Ng'olu hyanandiihiwa hiiti,  
 "Olw'ehyo nahahujumirye  
 ni ndi ŋalala n'Abatali Bayudaaya.

Nahembe enyembo ejihujumirya."\*

10 Era nindi ehyanandiihiwa hiroma hiiti,  
 "Enywe Abatali Bayudaaya,  
 musanalihisyenga ŋalala n'abaatu babe abaga-  
 tobola."\*

11 Era nindi hiiti,  
 "Mwesimwesi Abatali Bayudaaya,  
 abaatu mwesimwesi  
 mumugulumisenga."\*

12 Era nindi naabbi Yisaaya aloma ati,  
 "Mu lulyo lwa Yese,  
 mulinwamo anahanuge amawanga,  
 esuubi ly'Abatali Bayudaaya  
 liriba mu nje niye."\*

13 Hatonda ogira hwaba n'esuubi abasagaaluse era aban̄e emiyaaya olw'ohumufugiirira ko mweyongerenga ohuba n'esuubi olw'amaani g'Omwoyo Omutukuvu.

*Pawulo omujeeresa w'Abatali Bayudaaya*

14 Aboluganda, ese samwene kahahisa erala ti enywe mulimo ebiraŋi n'amagesi era manyire ehuhuhola era ti hiisi muutu an̄anga ohusomesa owahye.

15 Aye hu biitu ebindi mban̄andiihiye ni puma hubbimbirya ni mbahebulisa ehuhuhola. Hino

---

\* 15:9 15:9 2 Sam 22:50; Zab 18:49 \* 15:10 15:10 Mag 32:43

\* 15:11 15:11 Zab 117:1 \* 15:12 15:12 Yis 11:10

ciholire olw'ehisasabirisi ehi Hatonda gapambira.

<sup>16</sup> Gafuula ohuba omuñeeresa wa Yesu Kurisito eyiri Abatali Bayudaaya. Era ng'omusengi ndomere abaatu Amanuliro Amalanji aganjwa ewa Hatonda. Ehyo ko hiretere Abatali Bayudaaya abafugiirira Kurisito ohuba hy'enjongo eyi Hatonda asiima, ng'Omwoyo Omutukuvu nj'abagwalaahiise.

<sup>17</sup> Olw'ehyo, hinesiimisa mu Yesu Kurisito olw'omulimo ogukolera Hatonda.

<sup>18</sup> Simpanga huloma hu hiitu ehindi ohutusaho ebyo ebi Kurisito gahola n'abita mu ese ehireeteye Abatali Bayudaaya ohudembuhira Hatonda olw'ebyo ebinaloma n'ebinahola,

<sup>19</sup> ebyamaliholiho ebinahola olw'amaani g'Omwoyo Omutukuvu. Hiisi njaatu nja tiinire, ohunjwera erala e Yerusalemu ohwola e Yiririko, mbuliye abaatu Amanuliro Amalanji mu wiijufu aganjamba hu Kurisito.

<sup>20</sup> Ohwegomba hwange hubaaye hubuulira abaatu Amanuliro Amalanji mu bifo ebyo eyi batanjulirangaho hu Kurisito, ko taba hy'omuutu atongola hu musingi gw'owundi.

<sup>21</sup> Aye ng'olu hyanandiihiwa hiiti;

“Abo ababatalomerangaho

ebimuñambaho baja hufaanina,

ni naabo abatanjulirangaho

ebimuñambaho banahamutegeere.”\*

---

\* 15:21 15:21 Yis 52:15

22 Yino nj'esonga eyibayenga ni yipambiri-  
iye ohuuja eyo, mbaaye mbuulira Amanuliro  
Amalanji mu matwale ago.

*Pawulo ategeha ohuhyala e Rooma*

23 Aye njaahani ng'olu kenire omulimo gwange  
mu matwale ago era ng'olu kenire emyaha mingi  
ni negomba ohuuja ohubabonaho.

24 Nahabahyalireho ni tiina e Supeyini, mbeho  
ni nenywe era mupeho obuyeedi ko neyongereyo.

25 Aye njaahani ndi hutiina e Yersaalemu  
ohujiriraho abaatu ba Hatonda obuyeedi.

26 Abafugiirira ab'e Makedoniya n'abe Akaya  
n'esangaalo basalano ohuyeeda ebibbubbu  
by'abafugiirira abagadi abali e Yersaalemu.

27 Ehyo bahiholiire ni bahyesimiiye abeene  
era bali n'ebbanja ohuyeeda abaatu ba Ha-  
tonda abagadi mu Yersaalemu. Olwohuba  
Abatali Bayudaaya basuna ekabi ej'omwoyo  
mu Manuliro Amalanji ohujwa hu Bayudaaya,  
mu ngeri nj'enyene basaniiye boosi ohuyeeda  
Abayudaaya n'ebiiitu ebyahabuhuyabuhya.

28 Ni nahabe ni kenire ohubanjirira obuyeedi,  
nahabitireho eyo nabahyaliraho ko neyongereyo  
e Supeyini.

29 Manyire ti Kurisito anahatuje ekabi hwesi-  
hwesi ni nahaaje eyo.

30 Mbegayiriye balebe bange, hu lwa Musen-  
gwa weefe Yesu Kurisito n'olwohwenda ohu  
munyenda ohu Omwoyo Omutukuvu gabaŋa,  
hujambire njalala mu husaba hu lwange na-  
haaja eyo.

<sup>31</sup> Munombere muuti abo abatafugiirira Yesu Kurisito abali mu Buyudaaya batanjosaho hisago era n'abaatu ba Hatonda abali mu Yersaalemu basiime obujeeresa wange.

<sup>32</sup> Anjo ni huliba husiima hwa Hatonda niije ni nejuuye esangaalo hugobosaniemo amaani.

<sup>33</sup> Hatonda agaba emiyaaya abe ni nenywe mwesimwesi. Amiina.

## 16

### *Obuheese*

<sup>1</sup> Leha mbanjulire mboojo yeefe oyu balanga baati Feyibbe, omujeeresa w'ehibbubbu hy'abafugiirira Kurisito ehiri mu Kekiriya, alihuuja eyo.

<sup>2</sup> Mbasunga mumusangaalire mu kola enjeesa Musengwa enono. Era mumuje obuyeedi wosiwosi obu aba ni genda, yeesi abaye ayeeda abaatu bangi nga keesi pomundi.

<sup>3</sup> Keesaho Pulisikira n'Akwila aba kola ni naabo mu hujeeresa Yesu Kurisito.

<sup>4</sup> Abo bombi basinga omubiri ohuŋonia obulamu wange. Sindiise seenene aye ebibbubbu by'abafugiirira Kurisito eby'Abatali Bayudaaya byosibyosi bibeyaasa bugali weene.

<sup>5</sup> Mukeheeseho abafugiirira Kurisito abahumbaanira mu nyumba yaawe. Mukeheeseho ow'omuhago oyu balanga baati Payneeto owaali omudaayi ohufugiirira Kurisito mu twale ly'Asiya.

<sup>6</sup> Muheese ni Malyamu ow'abafululuhanira bugali.

<sup>7</sup> Keesaho abalebe bange Anduroniiko ni Yuniyasi aba nahola ni nabo obusibe mu komera. Abalebe bange abo bali n'obumanye eyiri abahwenda era nibo banjehereera ohufugiirira Kurisito.

<sup>8</sup> Muheese n'Apuliyaato ow'omuhago mu Musengwa weefe.

<sup>9</sup> Mukeheese ni Wurubbanasi oyu huhola ni naye mu hujeeesa Kurisito ko ni meeri yange Sitakiisi.

<sup>10</sup> Muheeseho n'Apele ogumiye ebigosi mu Kurisito. Era muheese n'abomumago g'Arisitobbulosi.

<sup>11</sup> Mukeheese ni mulebe yange Herodiyooni. Muheese abafugiirira Musengwa weefe abomu nyumba ya Narusiiso.

<sup>12</sup> Mukeheese Torofayina ni Torofisa, abahasi abahola bugali omulimo gwa Musengwa weefe. Mukeheese ni Perusi ow'omuhago, omuhasi atambiye Musengwa weefe bugali.

<sup>13</sup> Muheeseho ni Ruufusi oyu Musengwa gatabola. Muheese ni nyina ali oti hani nje maayi yange.

<sup>14</sup> Muheese Asukuritasi ni Fulegooni ni Herume ni Paturobasi ni Heruma ko n'aboluganda ababamenya ni nabo.

<sup>15</sup> Muheese Filologosi ni Yuliya ni Nerewo ni mboojoye n'Olipasi n'abaatu ba Hatonda bosibosi ababamenya ni nabo.

<sup>16</sup> Hiisi muutu aheese owahye mu keesa ey'abaatu abagwalaafu. Ebibbubbu by'abafugiirira Kurisito byosibyosi bibahehiise.

*Ebibono ebifundihira*

17 Aboluganda, mbegayiriiye mwegendere-senga abo abahola ebiitu ebireeta ohweyabujula, byagira abaatu baanaba baleha engira etuufu eyi babasomesa. Abaatu hy'abo, mubejalamenga.

18 Abaatu abo sibajeeresa ba Kurisito Musengwa weefe aye beyendulira hya hulya. Batambisa ebibono ebinyunyula n'ebiwanaawana olw'ohwenda ohudulinga abaatu abanjuma ehi bamanyire.

19 Hiisi muutu anjulira ng'olu mudembuhira Hatonda, c'ehigira ni ndi musangaafu olwenywe. Nenda mube bagesi mumanye ehiraŋi eh-yohuhola aye mwenjalame ehibi.

20 Hatonda ogaba emiyaaya, ali huupi huteteenera Sitaani ŋaasi w'amagulu genywe. Ehisasabirisi hya Musengwa weefe Yesu hibenga ni nenywe.

21 Temusewo omutambi wahyange abahеhiiseho. N'abalebe bange Lukiyo ni Yasoni ko ni Sosipateeri bosibosi babaheehiseho.

22 Era keesi Terutirasi omuŋandiihi w'ebbaluŋa yino, mbahehiiseho mu siina lya Musengwa weefe.

23 Gaayo obukumiire era omwene mago omu bafugiirira Kurisito bahumbaanira, abahеhiiseho. Erasito omuŋanika w'ehibuga\* ni Kwatasi babahehiise.

24 Musengwa weefe Yesu Kurisito abanjambirenga ehisa mwesimwesi.†

---

\* 16:23 16:23 Ehibuga baali bahiranga baati Koriiso. † 16:24 16:24 Ebyanjandiihiwa ebisinga obungi binjuma lunyiriri luno.



<sup>25</sup> Hujumiryenga Hatonda olwohuba asobola ohubagumya mu hufugiirira hwenywe ng'olu Amanjuro Amalaji galoma. Amanjuro ago aganjamba hu Yesu Kurisito nj'agandomera abaaatu. Era galoma hu hyama ehi bahweha ohujwa ahale nahale.

<sup>26</sup> Aye njaaahani ng'olu banaabbi banandiiha hu Kurisito, Hatonda oyo otafa galagira ehyama ehyo bahihwehule eyiri abaaatu bosibosi bahamufugiirira era bamudembuhire.

<sup>27</sup> Hatonda oyo ahihenaho era omwene magesi, abaaatu bamujenga enono ohubita mu Yesu Kurisito emirembe n'emirembe. Amiina.

**Endagaano Epyaha ko n'ebitabo ebindi  
eby'Endagaano Ekayire mu Lunyole  
Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

This is the New Testament in Lunyole of Uganda, with 10 books from the Old Testament.

All rights reserved.

2025-05-17

---

PDF generated using Haiola and XeLaTeX on 17 May 2025 from source files dated 17 May 2025

e00787cd-838f-597a-9477-00b97e4e2cff